

A low-angle photograph of a tree branch with white blossoms against a clear blue sky. The branch enters from the bottom left and extends towards the center, with several clusters of small, white, five-petaled flowers. The sky is a uniform, clear blue.

ISMAEL CARMONA GARCIA

Endofísica



**ISMAEL CARMONA GARCIA**

**Endofísica**



*Endofísica*  
Santu la portá: *Cirgüelus en frol*, 2010.

1l edicion, Agostu 2010

Esta obra está espubricá en bajo una licéncia Creative Commons, pola que se premiti el su usu públicu, cona condicion de reconocimientu la utoria.

Quean atarugaus los usus comercialis, la muacion i derivacion d'esta obra.

Pa mas enteracionis, vesiti:

<http://creativecommons.org/licenses/by-nc-nd/3.0/>

*Al saós i al mongi*



EL MUESTRU INTERIOL ES COMU UNA BORSA  
I QUE LA SU MAS HONDA RAZÓN  
NO DEJA DE SEL LA MESMA QUE,  
AL DA-LE LA GÜELTA DA DRENTU PA HUERA,  
SE HALLA EN AQUELLU QUE T'ARROEA.





## I

Almira mas l'obra la naturaleza  
que no la hecha pol ombri.  
Bella es la frol el cirgüelu  
mas por frol que por vé-la  
el ombri abril-se. Los arvus bien poaus  
desenbilmaus pola estijera esprimentá  
desvertua en ellus el propósitu  
que mosotrus inoramus.  
Son hermosus quandu bravius  
rumpin en ellus la primavera.  
La callis d'ellus i ellus enas parcelas  
no simulan el ordin natural  
i mas mos dileita aquél que creció  
vé-lo ellí junta el deságüi  
an pie la pista enllena pieras  
i destiendi las sus ramas  
por voluntá física, enliandu-se  
con el cañizu con comuelgu malvas.  
Éssi qu'afroreci inoranti de los bancalis  
i legu ena disposicion en palmereta,  
desconociendu la justícia el hierru,  
éssi vé-lo í es primavera.

02/03/2009

## II

Debujan las nuvis el celebru el mundu  
quandu apeñusgás i escuras cistan la ciá.  
Me hieri que las enbilmi el rebufiu  
de los cochis mentris arroçan los motoris  
sigún lo arruña el airi que respiru.  
Detrás, junta la esquina, el almendru  
á perdiu la frol i agora vergonçuas las ojinas  
cubrin las sus ramas. Entremeyu  
del cielu i el arvu, el ombri esgalaçaol.

06/03/2009

## III

Non, coraçón, sufras polas qu'enbarran  
la su fachá ca i quandu  
nin vaigas a himplal polas que riyin  
namás en vera Bacu.

Essi géneru mujeris repunan  
a los ojus, ensultu  
sonin al tu natural latieru.

Precura siempri a quien,  
comu una casa, l'acupa namás  
de lo mas nessecáriu  
i esté halta de las largas colás  
andi el gritiu s'estrumpa  
cona escurana i el vaziu. Dehuyi  
del paláciu qu'aspira  
la genti i de la casumba i el buhardu  
que la luzi conoci  
namás quantis que se barrumba i hundi:

Deja vé-lo ellí el marmu  
pa quien recubrin el réziu granitu.

Que non te contamini  
la hiel que las hazi heel en vida  
nin t'enlii por oyé-las  
las sus çarzaleras alicantinas.

Toitas amargujean.

Tu, corazón, busca la guipaina  
que tinta non te llori  
nin s'enculti en baju la sombra el humu  
arroea d'avantus.

Si te pon en idea de escael  
paí la escrava Cipri  
hateá hata el asfisi, revaca  
en que muchu la ciega  
la parti bajera el entendimientu.

Non es a la que buscas.

La naturaleza briega pa uñil  
quantitu es comparanti.

Non te desazoni el tiempu la espera  
pos tó está bien midiu.

Muchas vezis te golvierun el culu  
las que güenas creivas:

Piensa eno rebalizu l'opinion  
i cómu mollarquea

i que tó nel tu interiol es cambianti,  
pos la sangri sal i entra.

La certeza que buscas enjamás  
la vas a topal, solu  
confía en que quantis que latas a unu  
cona naturaleza

i con el tiempu, la mujel que precuras  
a la tu vera se halla.

12/04/2009

## IV

Agora que cai la tardi  
i ves las avis volal,  
pa pocu acupa la tu alma  
en trael lo de la mañana  
si entremeyu no huisti  
felís nin tapocu agora.

## V

Me hierin las orejas los motoris  
de los amotus desmanius  
i las parejinas bibiendu cerveza  
enas terraças mirandu-se a las gafas  
de sol m'espinan los párpagus  
hata lloral de coragi. El coraçón  
no quiel arrearal en estas feuras  
i de continu revaca el pensaeru  
pa no da-le passilera a los sentius,  
pero piensa en qu'el ombri  
tien que vél a los amantis  
palrandu entre ellus i ellus  
no por coraçón, sino por mobi;  
abraçal-se no ena frescança la yerva  
de los parquinus, sino guarreandu  
enas callejas junta los teneoris.  
No desapartu la barruntaera,  
pero tapocu quiu arrearal en ellu.

25/03/2009

## VI

Un silguerinu m'acompañó esta mañana  
por tres arvus. Primeru, aposau en denua  
rama, junta el encerau, agurava el piquinu  
desinquieta a tos laus. Alogu, según passé  
juntu poruntu saltó ligerinu al otru arvu  
hata que golví a bichal. Pero en el terceru  
no s'aposó, pos an pie la poceta ena grama  
consiguió ajuntal-se conos de la su espéci.  
M'alegré de la su suerti i de vé-le hechu  
compaña por tres arvus. Mentris, a la derecha  
el rebufiu los cochis aginaus pola mañana.

03/03/2009

## VII

*A Valdelacalcá*

Ena alamea ya no canta el cucu,  
namás los canáriu colgaus en jaulas.  
Vé í, que en brancu i negru non se mos quei  
quandu el veregel frescu antaño  
destendía pa ponienti i al norti  
la sombra chopus, ucalitus i olmus.  
Las tiernas paeris las casas nuevas,  
enbarrás poquinu á, s'arriavan  
en baju el réziu muru la arvolea.  
Las tupias tápias las anchas callis  
tenian d'escú natural muralla.  
Dos sigrus le duró la enpreñacion  
a esta vega hata que a la final  
parió entre La Cabrilla i Valdelobus,  
junta la via romana d'Emerita  
a Olissipus a Valdelacalcá.  
Muchu costó quitalle al ferti valli  
los arrayus (l'ambicion albarcó  
demaseau). A manu derecha era  
de Torrefresno, a la gocha, La Vara.  
Dambas a dos acistavan un chanu  
de matorragi acaina Guadiana:



atarfis i cardichas i escobonis  
jaras i çarzas i angún gurumelu.  
De pa los baldius La Vara prantarun  
brancas casas, altus arvus i huentis:  
vareñus huimus llamaus, lo mesmitu  
que los de pa Sarteneja assín bichan  
polos cortijus, no pol nombri el puebru.  
Muarun las tabuas i lloronis  
de Guadiana, de mas pallá La Barca  
—ogañazu enbarcaeru pa La Orden—  
hata el Puente Roto por ucalitus.  
A San Isiru Labraol celebran  
marchandu pola carretera al Muro  
n'alegri romeria ata Guadiana,  
a la sombra el ucalitu golienti.  
Cingarun el riu con paredi tierra,  
entre alamea i huélliga el arau  
cudiandu de que las cerrilis águas  
puyeran encenagal las parcelas.  
La pingorocha crecia los arvus  
dejó de zimbreal-se conos úmius  
airis de Portugal nin ñiu dengunu  
podrá abangal las sus ramas ya.  
La mesma ambicion qu'antaño encistava  
la ferti vega es la qu'ogaño cuerta  
el troncón enhiestu. Vinun las gruas  
a sacal pieras i a levantal casas:

cayerun los escús el riu i el puebru  
comu los de los érois trascolaus  
por hondeau viru injustu i sobérbiu.

06/04/2009

## VIII

Qué me quita los ojus de la tormenta?  
Por qué los oyius se desapartan del troniü breanti?  
Ná en el gris ai qu'encoruji el alma,  
ná ena culebrilla de soslai,  
sin embargu, sientu el promü que trai  
i m'amoorra i m'acibarra.  
Antañü m'arrebrujava el berrendu  
ena metá la senara quandu l'orilla  
cargá s'aposava poncima muestra  
i destendia hilinus de lus ataraçandu  
la tardi. Agora temu el graníciu  
que mallugui el tiernu frutu  
i que la piel delicaina estrüin  
los airis folasterus asseñalandu  
la su joventú i naidi endespues  
la quia. A la pacéncia el cúdiu  
esbanduja contra los sus pechus  
la naturaleza i la escora, paque  
se rebusteça i se haga a ella.

02/03/2009

## IX

Naidi a la bofa nactarina,  
toita marchá, recuerda  
quandu a la final hundi  
nel machu el güessu.  
Naidi a la çoronda  
que descudiá cayó  
sin el ombri cogé-la.  
Naidi a la que colgandu  
de la rama bajera  
entre talluas yervas  
se queó encultaina.  
Lu tu, qué tantu t'indina,  
de que quandu güelvas  
a la tierra naidi te llori?  
Denguna calli pusu velas  
ni abangarun las sus ramas  
en señal de duelgu.  
Tapocu aquellas piyerun  
espricacionis al arvu.

18/04/2009

## X

Ena bailaera los baguininus  
i en el su tiraeru  
se halla el prencípiu la coyontura.  
En drentu d'ellus anda  
el mistériu que los arremenea:  
no quieras tenteal  
lo que los tus sentius entavía apescan.

## XI

Agora que celebras el passu el tiempu  
no t'entristeças de que la corrienti  
desgasti el tu cuerpu i la mari pia  
ca vezi con vozi mas de réziu  
lo que es suyu. Alegra-te de la vida,  
de que ca mañana ascuchis ahuera  
la naturaleza pegandu trinius  
i afroreciendu i verdegueandu  
de que te quieris i te quierin,  
de que pueas sel felizi con pocu  
nel alcuentru de ti mesma.  
Los pecinus qu'están a anal  
naita din quandu ahorran  
pero los comprendis. Muchacha,  
las cosas mas deficis la vida  
no están pendienteis de mosotrus  
i convien dehuyil d'ellas.  
Las naturalis, las que acontecin  
sin que le preguntis por qué,  
se remenean enos muestrus coraçonis.  
Hihea d'alegria pol riu multicolol  
que passa! Seyas felís!

23/04/2009

## XII

El jeitu el ombri es guarreru.  
Siempri busca loal-se con carni, perras i sangri.  
Quando no, es arrastrau i calamitosu.  
Hondea a las estrellas los sus enceviquis  
i pii recordância por precural  
sel mejol pressona el ombri, quien  
inora que pa escomençal a sel ombri  
tien que atijal-se a la naturaleza  
por vezi desapartal-se. Pero la naturaleza  
crió al ombri en tó aparenti al viru dañinu:  
queandu maniu tolo que topa,  
enpoçoñandu riu andi ranea,  
arrasandu tolo que pisa  
i achacinandu quantu anda al reol,  
tó en quijiendu metel ena su horma al mundu.  
Cono faci que es hazé-lo al revés!  
El ombri qu'encaja con quantu vivi  
que pisa sin hollal i holla sin esgalaçal  
que bibi del mesmu riu en que se baña  
que toca la piera i conprendi su nombri,  
éssi vé-lo í puei izil qu'ahila por verea segura.  
*Quál es la naturaleza el ombri?...*

**XIII**

En ves en quandu  
los pobremas se crian  
en baju el calol  
dun mesmu hogal.  
I dun potriscu mal caiu  
se prendi el corazón  
de quien arriman el taju  
ca nochi pa calienta-se.  
La calda alogu cuezi enas entrañas,  
ahumandu el entendimientu.

*25/04/2009*



## XIV

A la gocha el sol, la luna a la derecha,  
delantri la montaña i detrás.  
La coyuntura era perfeta.  
El airi me breava la cara  
arriba la piera el pensaeru.  
Me trascolava el pechu  
arrepañandu el mal sentil.  
Ena cimera ná me preocupava,  
dengún aginu traivan el verdol,  
ni el airi, ni el rocagi, ni el regachu  
que se destiendi arruñandu los pastus.  
El mundu entrava enas mis entrañas  
i yo bichava tamien enas suyas.

09/03/2009

XV

El sueño que tuvisti ayel-nochi  
es tuyu  
*an expectas ut Quintilianus ametur?*

## XVI

Tristi espetáculu el de la cirgüela  
que s'empoheci ena rama mas cimera  
i primorosa del arvu.

Bien la queó el pairi arribina  
paque el sol i el airi la hormaran,  
lejotis la umiá del suelu.

Pero un pájaru

la hirió,

la piteró,

la picó

i agora sin consuelgu se pui.

25/04/2009

## XVII

Comis la cena  
i piensas ena de mañana:  
no enllenas alma,  
sino que a continu la engüeras.

**XVIII**

Esta mañana cogiendu cirgüelas  
me se cayó el cubu. «A tós  
les passa!» Estava quasi que enllenu,  
namás le haltava un pal d'amboçás,  
pero la escachaiza rama  
que se destendia pa la gocha  
se quebró pondi estava el garabatu  
assentau. El arvu no supu  
suportal el desequilíbriu el ombri  
que queriva metel en un cubu  
lo qu'él sábiamenti arrepartia.

*02/03/2009*

## XIX

La razón que tó lo rigi es simpri i honda,  
pero mos enpatarata pa entendé-la  
un ergullu míseri i escuru. Lu, creyis  
mas enos metrus que enas huerças,  
mas ena sintassi que enas parabras  
mas ena sospecha que ena certeza?  
Ná que seya natural es malu,  
lo malu lo criamus mosotrus.  
Ten presenteru que mos aginamus  
por pelilleries a las que hazemus bosquis  
quandu el ánimu vuela sin sostribu.  
Respela la fusca sin enrabi i escuaja  
da drentu el pensamientu que t'atija  
a lo que no seya pendiente de ti.  
Abaldona la lassitú de lo faci  
—tamien tu te lo enventasti—  
i agarra la feliciá anque venga  
biscorneá i amargujei a lo primeru.  
Que del coraçón no abarbi la mágua  
ni el *porqué* mani de la tu boca:  
aceta-la comu s'encaji, que la via  
atorga en una luenga que no palramus.

23/04/2009

## ÍNDICI

I.	<u><i>Almira mas l'obra la naturaleza</i></u> .....	9
II.	<u><i>Debujan las nuvis</i></u> .....	10
III.	<u><i>Non, corazón, sufras</i></u> .....	11
IV.	<u><i>Agora que cai la tardi</i></u> .....	13
V.	<u><i>Me hierin las orejas</i></u> .....	14
VI.	<u><i>Un silguerinnu</i></u> .....	15
VII.	<u><i>Ena alamea</i></u> .....	16
VIII.	<u><i>Qué me quita los ojus de la tormenta?</i></u> .....	19
IX.	<u><i>Naidi a la bofa nactarina</i></u> .....	20
X.	<u><i>Ena bailaera los baguininus</i></u> .....	21
XI.	<u><i>Agora que celebras el passu el tiempu</i></u> .....	22
XII.	<u><i>El jeitu el ombri</i></u> .....	23
XIII.	<u><i>En ves en quandu</i></u> .....	24
XIV.	<u><i>A la gocha el sol</i></u> .....	25
XV.	<u><i>El sueñu</i></u> .....	26
XVI.	<u><i>Tristi espetáculu</i></u> .....	27
XVII.	<u><i>Comis la cena</i></u> .....	28
XVIII.	<u><i>Esta mañana</i></u> .....	29
XIX.	<u><i>La razón</i></u> .....	30

Sobre el autor:  
Ismael Carmona García  
(Badajoz, 1986)  
Hijo de valviense y  
poblanchina. Licenciado en  
Filología Clásica por la UEx.  
Investigador y gramático del extremeño.  
Autor de *Ortografía del extremeño* (2007) y  
*Morfología del extremeño* (2009).  
Promotor de la Güiquipeya  
y redactor de las bitácoras  
*Cúyu pan esgarras?*,  
*Las Vegas Bajas* y *La bellota literária*.  
Para cualquier duda,  
rectificaciones o sugerencias,  
escriban a  
[CCnBohemius@hotmail.com](mailto:CCnBohemius@hotmail.com).